



QUÆSTIO MEDICA,
QUODLIBETARIIS DISPUTATIONIBUS
MANE' DISCUTIENDA,
IN SCHOLIS MEDICORUM.

Die Jovis Februarii undecimâ 1706.

M. JOANNE DE' PINEY PESCHARD
DOCTORE MEDICO,
PRÆSIDE.

Utrum, æstuante Februm intermittens paroxysmo, vena sectio?

1.



U ANDIU non lutulenti, sed sinceri fluunt corporis liquores, febre non tentatur; expedito motu in tenuissimos tubos illabuntur. Obcunt alacriter partes solidæ suas functiones; quia liquidorum moles æquanti habet rationem ad vasorum amplitudinem, & vires. Tonico, & perenni motu concitata fibræ solidorum, promovent facilem transpirationem; liquida placido cursu quaquaversum impulsæ à solidis, diffunduntur, & benignum ubique rorem impertiuntur; rursus suâ texturâ, & Mathematicâ sibi cohesione devinctæ solidæ, nullis obicibus impedita, levi impetu liquidorum impelluntur. Hic motum percipiemus contempleris, de quo texere tot futilia commenta otiosi Philosophi. Tria stupendam hanc concordiam perturbant. Vitia solidorum, moles liquidorum major, quam quæ possit motu libero intra vasa fluere; eorumdem corruptela, viscidis crassisque particulis illata, quæ vel difficulter liquidi naturam suscipiunt, vel eam, suâ contumaci figurâ, penitus induere renuunt. Ubi liquida redundant, eam resistantiam impetui solidorum objiciunt, quæ vix ab illis possit superari; illorum impulsu motu laborioso intra vasa ægrius feruntur; angustiori, pro suâ mole, aut turgescentiâ, spatio

A

vasorum coactata; motus enim in pleno, inanis est fabula. Hinc gravitates, & difficultates spirandi, unâ, aut alterâ venâ sectione tollendæ; si diutius illa protrahatur, facile sanguis vitium concipit. De liquidis enim compositis, ea naturæ lex est, ut per quietem, pravâ fermentatione, labem citò contrahant, aut omninò dissolvantur, in alienam mutata à priori naturam. Ubi autem liquidis heterogenea miscentur, partes ipsorum, partibus suis viscidis, vel irretiunt, vel crassius obtrundunt, vel earum figuris, ab invicem divellunt, vel pondere obruunt; tum liquidi nativi mollicula ægrè, & motu progressivo, & circâ centrum suum volvuntur; tota moles facta ipsa viscidior, torpescit, motui suscipiendo, aut communicando inepta. Parte hujus materiæ in aliquem angulum impactâ, dolor, inflammatio, & apostemata gignuntur. Solida remisso motu, & languido, at frequentius repetito, aguntur, quod illum à fluidis mutentur, pigris & turbulentis, acerbis tamen, quæ vellicationibus spasmos illis, non motus ad Mathematicas leges exactos, pro natura instituto, imperiuntur. Liquida ergò spissioris diathesis, adversus solida eâ resistantiâ luctantur, quæ vix superatur à solidis. Inde vires concidunt, languescunt functiones, aer, solus magna vis, & potentia naturæ, spisso liquido implexus, virtutem resiliendi, & impetum elidit. Ita, motu corporis penè obliterato, ejus extrema frigore corripuntur; motus enim, & caloris in corpore nullum discrimen. Cum superior est resistantiâ liquidi crassioris resistantiâ solidorum, & aeris in liquidum infusi, de salute ægrotantis conclamatum est. Vano impetu conatur præsentem perniciem depellere; undè, paroxysmo declinante, nullus victrix enim, pro eâ vice, natura evasit) omnes incunte, aut furente pereunt. Chylus, malè subactus à solidis, crudior, acidus, aut nidorosus, faciescit in substantiam flavam, subdulcem, aut amaram, quæ perverfas fermentationes in sanguine concitat; de quibus immeritò bilem, aut salem volatilem oleosum, lienem, aut hepar criminantur; vitia enim, quibus corrumpuntur, ipsi chylus, & sanguis inflixerunt. Si partes heterogenæ, partibus sinceris sint inferiores, sale volatili bilis lixivioso, & succo pancreatico, salivæ non omninò dissimili, solvuntur, & subiguntur, partibus solidis in subsidium venientibus. In præceps aguntur particulae, quæ nullo fœdere sanguini sociari possunt; eodem penè ritu, quo fiunt chymicæ *precipitationes* Ipse perennis motus, circuitiois non parùm confert ad eas excutiendas: coguntur vitiosæ particulae cum sinceris, adactæ motu vehementi solidorum, meatus glandularum, & poros cutis simul, absque discrimine, subire, ut patet ex fœtore sudorum, & urinatorum, remittente paroxysmo; aer etiam permixtus liquoribus, vi suâ elasticâ, ad illas derruendas, cæteris adjungitur; sic paroxysmus febrilis nifus est, & impetus naturæ, quæ sibi infesta sunt, molientis excutere.

II.

TOT videntur esse hujus sententiæ argumenta, quot sunt febrium intermittentium symptomata; periodus paroxysmorum, membrorum gravitates, pulsus parvus, & frequens, frigus, dein æstus urens, capitis dolor, urina primum tenuis, postea crassa, & turbida. Medici & Philosophi circâ periodos paroxysmorum febrium intermittitum ingentibus spiritibus, sed infausto, ut videtur, exitu se exercuerunt. An non conjicere liceat molem liquidorum, in ratione esse debere ad vasorum amplitudinem, ut tamen liquida se liberè moveant: Fermentationem etiam, nisi

præscriptâ quadam mole fermenti, non promoveri. Non coercetur quidem in vino gravis aliquot limaturâ chalybis, ac pluribus uncis subitò comprimitur. Amplitudo tubulorum corporis mensura est fermenti febrilis, quod in sanguinem, tempore febrium intermittentium, illabitur, Sanguis, suscepto ad certam rationem, eo vitio, intumescit, donec ista corruptela paroxysmo deturbetur. Liquidorum partes temerario motu volvuntur, nisi solida eas dirigant. A solidis ergo repetenda erit, ad libellam composita, paroxysmorum periodus, & ipsa circuitio sanguinis, semper æquo cursu progrediens. Lautior cibus, per febrem ingestus, tempora paroxysmorum accelerat, qui & longius protrahuntur, & recrudescunt vehementius, & febrem diutius fovent, factâ mensurâ fermenti magis confertâ, quam ubi parcius usurpantur alimenta. Sanguis his alienis particulis gravis, cordis, & arteriarum, musculorum etiam, & membranarum resiliendi virtuti, resistentiam, longè solitâ majorem, objicit. Hinc sapiens conditor naturæ ita cor fabricavit, ut vim impetitus illi fuerit, quæ necdum tota sese exerat, dum sani fumus, & liquores libero motu feruntur, ex minimâ sui parte in illos non exercetur; explicatur autem, quantum potest, dum morbo cortipimur, ut liquidi viscidioris gravem resistentiam possint superare. Hæc ita si se non haberent, homo, vel levi febre, statim necaretur, quia semper cordis, & solidorum resistentia, resistentiâ liquidi foret inferior. Dum spissior sanguis est, cor vim omnem suam impendit, debile tamen, si fidem sensibus faciamus, quia hærens in eo luto, rotis viribus luctatur. Frequentiâ autem ictuum leviorum, & conterit sanguinem in minimas particulas, & celerius his repetitis vibrationibus, (spasmos potius dixeris, illatos ab aeribus liquidis, varios pro vario situ, texturâ, & configuratione solidorum) solitam circiter exaquat periodum circuitiois, quâ liquida impellit, dum sanitate fruimur, & expedito motu labuntur, frequentiâ enim vibrationum refarcitur, quod, lentore liquidi, cordis impetui detrahitur, & velocitatis gradus augentur pro mole, & ratione ponderis gravioris, quod impellitur. Non ex mole tantum, sed etiam ex velocitate, quantitas motus est æstimanda. Eadem velocitas globuli è sclopeto emissi, quâ celerissime torquetur, globum tormenti bellici à quiete non dimovebit, dum autem hic quiescere videtur, sternit, & comminuit obvia quæque; pro molis enim ratione, plurimos habet gradus velocitatis. Idem de sanguine viscidiori dixeris. Hinc collige sapienter ægrorum saluti eâ ratione fuisse consultum, qui cerè perirent omnes, brevi temporis intervallo, sanguinis mole penitus concreatâ, nisi vehementius ea pellexeretur, dum lentior est, quàm ubi tenuis, & sincera fluit. Motus solidorum illic deficeret; sanguinem etiam, eò tenaciorem esse, quò pulsus minor est, & frequentior. Infusus, eâ labe tactus sanguis, in vesiculas sphaeroidales musculorum, aeris cum succo nerveo in eas allapsi, suo visco elaterium elidit, retundit fibrarum ipsarum resiliendi vim, ætè aer, & fibræ se explicant, penè inani conatu & impetu, frequenti tamen; torpidus musculus venter se vix attollit, tumidus quidem, sed infarsctus vitiosi liquidi. Indè gravitates membrorum, altum soporem, spirandi difficultates, commodè deduxeris, apostemata etiam aliquandò, ubi penitus liquidorum motus intercipitur. Ipsorum mole, præter morem, perversâ fermentatione turgescente, solita vasorum amplitudo vix illi continendæ sufficit, ne dum eo lapsu facili, quo par est, rapiatur; interna latera arteriarum, quibus & lenti sanguinis particule hærescunt, penè ultrâ metas suæ virtutis elasticæ, turgente liquido

extenduntur; undè graviter ad se redeunt, & remisso elatere, at celeriori, quàm in statu sano, pulsant. Pulsant quoque, insensili quidem, assiduo tamen motu tonico, motui cordis, & arteriarum synchronico, fibræ solidorum, cum viget sanitas, Premunt glandulas, & papillas pyramidales circa illas convolutæ gemitationes nervorum, & musculi, exprimuntque laticem serosum, & cogunt in auras abire, flexuosis suis vorticibus percolatum. In febre transpiratio insensilis desinit, aut fit parcius, quia ille motus in peripheriâ, & longius à suo centro peragitur, concretis, velut gelu, corporis liquoribus, & coactis. Illicò membra extima frigus occupat, (nullum enim frigoris à quiete discrimen) dùm intima aliquandò crucianti calore utuntur; quætitur æger tremulis subsultibus, quia conclusus aer in vesiculis musculorum, & in fibris membranarum, quantum potest, elaterium suum, sed sine lege, irretitus alienis particulis exerit, qui, si foret sui juris, calore magis resiliet, quàm premeretur. Frigore soluto, exercet ægrum universalis æstus, dùm remittit calor internus, dolor capitis immitis, phrenitis indocilis mitigari: scilicet liquida, particulis heterogeneis fœta, per quietem inficiuntur variis saporibus, acedine, aciditate, rancore, pro salium indole, aut sulphurum. Mustum non effervesceat, nisi antè uno, aut altero die quieverit; sales evehuntur, secum congruuntur vehementius, fervor ingens tunc agitat molem. Sanguinis sales, & sulphura, temerario, & concitato motu correpta, torquentur in membranas, & musculos totius corporis. Suis aculeis alienæ particulæ, purioribus strictiori, & idèd noxio fœdere sociatæ, ad rapidas vibrationes, & spasmos, illas adigunt. Istis crispationibus animæ inferitur sensus doloris, & caloris. Solida ingentes in liquida vires exercent, crassiora conterunt & subigunt repetitis ictibus. Hæc vicissim, validâ vi, & pernecitate contorta in solida, jam vehementer commota, magis ac magis instigant, æstu urenti corpus excandescit. Magno impetu fermentatione concitatâ, partes heterogenæ liquidorum, soluto vinculo, à sinceris fecernuntur, tum viscerum incerniculis, tum vi effervescentiæ; natant, velut caput mortuum, in seroso latice, & cum eo, per ductus excretorios corporis in præceps aguntur. Nihil mustum, vel cerevisia, fœcibus turbida, quovis admoto colatorio, deponent. Si aliquandiù passus fueris ea fermentescere, fiet secretio alienarum particularum à nativis; hæc limpida colatorii poros prætergredientur, illæ ipsæ inhærebunt. Hinc, furente paroxysmo, pellucidæ, tenues, & crudæ sunt urinæ; remittente, crassæ, & turbulentiæ; quia motu fermentationis, partes sanguinis, alienis deturbatis, sibi amico fœdere junguntur, undè eò salubrius est signum coctionis, quò subsidet copiosius sedimentum. Si autem, turgidâ liquidorum mole victis solidis, perseveret effervescencia, solvitur textura sanguinis, urinæ stant crudæ, aut evanescent signa coctionis, ægerque fatis defungitur. Si verò solida superent resistentiam liquidorum, & valeant horum puriores particulæ viciosas subigere, & detrudere, corpus in sudores, & urinas exsolvitur; fibræ omnes, aut redundanti liquore tumide, aut irritatione crispatæ, nimiumque tensæ laxantur, redeuntque ad expeditum, & consuetum motum tonicum; pulsus incipit æquo pede progredi, evanescent capitis gravitas, & dolor; compressæ quiescunt paulatim, quæ in toto corpore molestiæ percipiuntur. Partes omnes ad officia solita revertuntur. Paroxysmus ergò febrium intermitrentium visus est, & impetus naturæ, satagentis, quo premitur, pondus excutere.

NULLUM venæ sectione remedium laudatum est effusius, nullum pertinaciori maledicentia traductum. Alii sine lege, in omni morborum genere illud usurpant; alii ab eodem ubivis abhorrent. An non Iliacos intra muros, & extra peccari jure dixerimus? Qui supercilio intolerabili istud subsidium respuunt, naturam consulant, sibi vias insolitas aliquando referantem, ut se liberet onere graviore sanguinis exundantis, quo ipsa fatiscit. Pleni sunt, vel in margine scriptores istis exemplis. Quis negaverit in plethorâ, agrum, majorem ex unâ venæ sectione, fructum percepturum, quàm ex diuturno jejunio, assiduâ, & repetitis corporis exercitationibus, cucurbitulis, aut hirudinibus? Repressis assuetis vacuationibus, sanguinis moles augetur. Omnia enim ita legibus Mathematicis in corpore contemperantur, ut liquores ad præscriptam mensuram suscipiat. Ubi prætergreditur eas metas, arte redundantia coercenda est, si natura sui oblita, ipsa sibi hærenti in discrimine, opem non ferat. Impune aliquando non patitur istud sibi non concedi præsidium, si per aliquod tempus huic assueverit, dolet eo negato, vitamque trahit infelicem. Quotidie experientia compertum habemus, venæ sectione menstrua revocari, lochia fluere, abortum imminentem cohiberi, & promovendi partum difficilem. Fatemur quidem, *negativè*, ut aiunt, & *per accidens*, ferre superpetias venæ sectionem, ubi sanguis abundat, aut motus ejus intercipitur, aut languescit fermentatio. Secetur ergo vena, si, aut plumis, aut mensâ Sardanapali sanguinis moles aucta fuerit, aut repressæ sint solitæ vacuationes, aut eam secandi, statim temporibus, consuetudo inoleverit, aut effervescentiâ febrili sanguis perturbetur. Secetur autem, ejus æstu, & paroxysmo furente, si, quod speres ab eo remedio subsidium, & fructum, velis ægrotantem percipere; tunc enim favet naturæ molienti se expedire, & intentæ. Hæc sunt quatuor tantum *essentialia* discrimina, quibus prudentibus venæ sectio suggeritur. Vitæ genus, varii tractus regionum, ætas, & vires, anni tempestates *secundaria* sunt, & *accidentales* indicationes.

IV.

ILLI supremum artis apicem assécutus est, qui naturam, vegetam quidem, quàm proximè potest, imitatur, (labascentem enim sustinere, erigere jacentem, præposteros motus ejus aut antevertere, aut cohibere, Medici officium est; quia ipsam agunt præcipitem ad interitum) verum alacriter pugnantem adjuvet; hostis nervos, & lacertos rescindat, ut vividiores, validioresque sint: utiliores etiam ejus impetus. De solidis omnibus, quæ motuum sunt organa, dictum putes, quod jam de corde diximus: scilicet, sanitatis tempore, cum liquida motu libero fluunt, minimam partem adversus ea, virium suarum impendere: æstuante verò febrili paroxysmo, illas, quantum possunt, explicare, ut objectam sibi liquidorum resistantiam superent. Si validiori vi luctentur, quàm resistant liquida, hæc subacta contentur; sin contrâ: solida vires suas elident, inanes in conatus assurgent, & victa graviore pondere opprimuntur. Atqui, furente paroxysmo, usurpata venæ sectio, venit in auxilium cordi, musculis, & arteriis laborantibus, atque ingentes conantibus in impetus erumpere. Partem liquidi resistentis detrahendo, solida facta alia criora, novas vires colligunt, animosius certamen rectudescit: quia tollitur objecta viribus illorum resistentia, quâ debiliores erant, & frangebantur. Quando saltem maneat sanguis, remittunt turgida liquida; (vinum æstuans in dolio, quando effluit

deponit furorem) intumescunt quidem, ut antè, obturatà venâ, sed repetitis venæ sectionibus, tandem quàm minimùm in turgescentiâ attollitur tota moles, & licet brevius sit temporis intervallum, per quod sanguis effluendo detumescit, solida maximo illud sibi lucro apponunt, quàm celerrimè, remoto obice, oppressas vires revocando, ut vincant liquidorum turgescentiâ, quæ validiùs sibi, quàm ipsa eorum moles resistit; non enim ex mole tantùm, sed etiam ex motù velocitate, juxta leges naturæ, computanda est resistentia. Nolim arbitreris novas vires venæ sectione *passivè* solidis adjici. Insitas tantùm exerunt, detractò pondere, quo premebantur. Aer, totius motùs naturæ solus autor, membranarum, quibus partes involvuntur, & musculis conclusus, minùs, quàm antea, compressus, suum elaterium evolvit, ut magis expediret motus edant alternos, & reciprocos; qui etiam intus latet recessibus liquidorum, spatio liberiori sibi concessò, in vehementiores impetus erumpit, ut celerius deturbet alienas particulas; externus quoque faciliùs in sanguinem infunditur. Exerunt validà vi suum elaterium, quod in pleno se explicare non poterat; externo enim pondere aere compresso, laminarum spiralarum, ex quibus constat, extrema ad invicem, plus minùsve accedunt, (nulla enim vi naturali cogi possunt, ut ipsa se tangant) quòd pondus gravius est, cò vehementiùs aer in elasticos impetus erumpit. Magis densatur, quia laminarum spiralarum extremis magis ad invicem adductis, minori spatio, & volumine coercetur. Hinc, factà venæ sectione, statim pulsus robustior percipitur, ægrescitque, ad tempus, febrilis ardor, quia liquida, solidaque tunc celeriori motu corripiuntur, & ingenti nisu conantur hærens sibi vitium excutere; vehementi calore accenso, nascitur alteruter ex his effectibus. Si liber sit aeri locus, ut se explicet, rarior fit, & dilatatur calore; eodem verò elastica vis augetur, si loco angustiori contrahatur. Calor aquæ bullientis ex tertiâ parte auget illud aeris elaterium, quo pollet terræ incumbens, à totâ atmosphærâ compressus. Sustinet mercurium ad 28. pollices altitudinis. Vires novem pollicum, & quatuor linearum calore aquæ, ipsi accedunt: ut mercurius ad 37. pollices & 4. lineas ascendat. His adde, eodem gradu caloris, tantùm augeri dilatationem aeris, quantum grave est pondus, quo premitur: quia ignitæ particule in laminas se inserunt, & eas evolvunt, sin contrâ explicare se nequeat, augebitur ejus elaterium. At venæ sectione demitur ex premente pondere, ut laminarum viscidis particulis implicatæ, elaterium liberius exerendo, & illas excutiant, & se dilatando, protrudant. Sanguis igitur, câ methodo, citissimè feces deponit; aere enim interno cum externo, quo involvimur, revocato ad æquilibrium, partes solidæ inter utrumque interceptæ, ad solitam, liberamque motùs alternationem redeunt, quia tunc aer internus calore magis resilit, quàm premitur ab externo: neque hic, ut antea, pondere suo, musculos, & membranas, fabricatas conterendis liquoribus, opprimat. Antè venæ sectionem, in astu febrili celebratam, musculi inter liquidum viscosum, & turgescens, objiciensque resistentiam, penè non imparem corporis solidi, atque immoti resistentiæ, & pondus aeris externi conclusi, ferè torpidi, & pigri jacent. His adde, viscidis humoribus imbuta solida, penè inani conatu, licet frequenti, se vix attollere. Hinc tensiones abdominis, spirandi difficultas, motus impotentia, partium durities. At venæ sectione ea tolluntur incommoda, & molestiæ, quia faciliùs aer interior, receptis viribus musculos repellit, ab externo compressos; sic restituitur motus alternationis musculorum abdominis, qui repellunt aerem ex-

ternum, ab eo antè compressi, atque in viscera adacti. His stat, & continetur te-
nor vitæ, his machinæ operationes. Qui motum solidorum corporis perenni-
tati tam necessarius est aer, haud minùs confert ad liquidorum fermentationes.
Fructus, & liquores in machinâ Boylianâ, etiam per plures menses asservati, ex-
hausto aere, nullam, aut levem alterationem patiuntur; nullam quoquè mustum sub-
bit fermentationem, si dolium plenum diligentius, & citò obturetur, nec gratum acorem
liquor consequitur, nec feces deponit; è contrâ, frangerentur retortæ Chymistarum,
si ad ora impleverentur. Aer enim, qui tredecies comprimitur, ut ex scolopeto pneu-
matico compertum habemus, tredecies quoque dilatatur ultra statum naturalem,
in liquoribus, quos continent vasa chymica coërcitus, expansus vi caloris, ea
comminueret, quia vehementissimè fermentescunt. Promoveretur ergò fermentatio
celerius in spatio minùs contracto, sanguis citius à fœcibus liberatur, factâ venæ
sectione, vigente, non verò depressâ ejus fermentatione, seu æstuante, non detur-
mescente paroxysmo. Neque postea diuturnam moram trahit febris, quin evanescat.
Imò puriores sanguinis particule citò, excusso vitio, quo inficiebantur, servant à
corruptelâ suam texturam, quæ, longiori vitiosi humoris contubernio, penitus so-
luta fuisset, aut eam labem contraxisset, quæ, ex febris tertianâ simplici, accersivisset
duplicem tertianam, aut continuam, & putridam: ut, in vulgari methodo, sæpius
illud contingit, remittente enim paroxysmo, factâ venæ sectio leve præsidium est,
liquidum vitiosis particulis antea grave, tunc verò magna ex parte exturbatis, de-
tumuit. Solida quiescunt, & quantum sanguinis tum detrahitur, tantum demit-
tur ex ipsorum viribus, quibus paria novis insultibus fierent. Hæc venit in auxilium
non laborantis naturæ, atque hoste devicto. In eo, sine auxilio, conterendo vires suas
exhaustit, & quæ supersunt, novâ vacuatione prosteruntur, ut sequenti paroxysmo
ferendo sint impares. Sanguis emittitur ferè inraminatus, quia in præceps actæ sunt
ejus corruptelæ priori paroxysmo; turbidus è contrâ, eo æstuante, elicitur, & pars
fermenti febrilis non minima subducitur. Tunc vegetum corpus, hosti profligan-
do intentum, minùs ægrè patitur partis virium suarum jacturam, quam ubi cona-
tibus ingentibus, quos ediderit, penè exhaustæ fuerint. Undè experientiâ edocemur,
eâ ratione usurpandâ in paroxysmo venæ sectionis, hunc & fieri breviorē, & ce-
lerius elici sudores, atque urinas, & capitis dolores evanescere, & sitim sedari,
& tensa, aut crispata solida acredine humoris remittere, ad motumque tonicum re-
dire, & liberius sanguinem currere per corporis peripheriam.

V.

VENÆ sectio, educendo materiam febrilem, non impedit quidem, quominùs
nova generetur, quæ postea in vasa sanguinea deferatur; detractâ parte lactis
bullientis, quod superstes est, ut antea, effervescit; imò vehementiâ majori
diutius tumultuatur, ignitis particulis faciliùs minorem molem materiæ moventi-
bus; hinc frequentius repetitis venæ sectionibus, febres intermittentes continuæ
sunt: continuæ verò, impotenti exandescentiâ, ægrescunt. Quibus aridet consue-
tudo secandi venam, paroxysmo remittente, ipsi excutiant illud incommodum,
Locum concedunt, & suppeditant occasionem vitiosæ materiæ, in visceribus la-
tenti, se faciliùs in sanguinem infundendi, solidis liquidisque tum quiescenti-
bus, & otiosis, nec intentis vitio, quod molestiam facescit, excutiendo, sicut sata-
gunt illud deturbare, æstuante paroxysmo. Vires ipsorum venæ sectione, *negativè*

quidem, citissime restituuntur, exerunt, quâ possunt, vi maximâ, suum elaterium ; sed, ne faciat impetum, cohibentur, eo quo premuntur, pondere. Ensis inflexus, obice remoto, qui cum coercebatur, statim, & subito ad se revertitur. Conterunt ergo solida liquores vehementius. Committitur viscus, quo prave inficiuntur. Liquida etiam, cum solidis, quasi sancito fœdere, vel subigunt, vel fugant, quæ sibi labem inferunt. Urgent, & querunt ambiciosius, num venæ sectio sit sanguini, vitium contrahenti, præsens medela ? Febrile fermentum, vel acidum est, vel amarum, variisq; salibus, & sulphuribus refertum. Atqui neque amaritudinem sulphurum venæ sectio temperat, neque acida limphæ retundit, neque infringit salium aculeos, neque mitigat succorum acredinem ; partibus heterogeneis figuram, texturamque non impertitur, quâ fiant cum sanguine sociabiles, ut placidè circuletur, ut benignè cum illis fermentescat. Frustrâ accensum vinum è dolio eduxeris, quod supererit, acida non deponet. Qui venæ sectionem istis pulsare, aut etiam subvertere nituntur, iniquius, vel incautiùs hæc ingerunt. Liquidorum corporis saporès *positive* ad instam indolem revocare, non artis est opus, sed naturæ. Nihil opis, nisi *negative*, ferre potest Medicina morbo correptis, rescindendo, vacuando, minuendo, deflectendo materiam, quæ peccat, Pharmaca ministrando, quæ conatus adjuvent, & promoveant impetus partium puriorum liquidi, ut validius cum heterogeneis luctentur, & abigant, vel augeant, minuantve motum tonicum solidorum, ut, junctis viribus, cum liquidis se vindicent in libertatem. Risum teneatis, spectatum admissi vinitorem, in grana uvæ acerbæ instillantem liquores, ut cum referant mense Julio, saporem, quem præstabunt, mense Septembris, ubi mitigata fuerint, concessio temporis intervallo, à sapienti naturâ præscripto. Possumus quidem ejus opus urgere, ut citius grana maturescant ; ille verò laterem lavabit, qui supplere aggressus fuerit ejus operationes. Possumus ergo ei laboranti, & domandis pravis saporibus intenræ, ferre manus auxiliatrices ; at sine illâ, æquè possumus carminibus cælo deducere lunam.

Ergo, æstuate paroxysmo Febrim intermittentium, venæ sectio.

Domini Doctores disputaturi.

<i>M. Ludovicus de Mondiers Dugué.</i>	<i>M. Philippus-Bernardus de Bordegaraye.</i>	<i>M. Dominicus de Farcy.</i>
<i>M. Raymondus-Jacobus Finot, Scholarum Professor.</i>	<i>M. Jacobus-Simon-Gilles de la Rivierre.</i>	<i>M. Henricus-Mahien, Regina Dotaria Poloniæ Archiatr.</i>
<i>M. Claudius Berger, è Regiâ Scientiarum Academiâ, & Scholarum Professor.</i>	<i>M. Ludovicus Lemery, è Regiâ Scientiarum Aca- demiâ.</i>	<i>M. Claudius Guérin.</i>

Proponebat Parisiis JOANNES FRANCISCUS COUTHIER, Vitellensis ;
Baccalaureus Medicus. A. R. S. H. 1706.

Ex Typographiâ P. A. le Mercier,